

# 1 YOHANE

## Yohane Kukū Kasale

*Yaa Olaa Wɔ Ninta Ni Nkpa Ninle Kristo.*

<sup>1</sup> Buokpana kukū munkyese ye di olaa wɔ ninta ni nkpa suoto, kuawɛ ni bia kaso kakyeko. Buanu nwu, buanya nwu kafɔɔ anu ku anu. Nwaako kafɔɔ buakpanko nwu ku nnɛ loo. <sup>2</sup> Obe wɔ di Yaa ladiki ni otii wɔ ninle ni olaa nwu nkpo ninta ni nkpa kayi yi, buanyɔɔ ku anu, ni buoyie nwo lekya nɛ. Muntoko ye kafɔɔ nwo ninkpe ni nkpa be ninnaa ni kaaloo ninkpe ni di Ote Yaa nfū, ni di Yaa lata wo buotofo nwo nɛ. <sup>3</sup> Lesaa le butɔɔnya buonu nii, nni lekya buoyie munta ye nɛ, mmle okle di aye kafɔɔ biawa mimakyakaa ni di awo, di onwii obla wɔ ninkpe wo ni ku Ote ku Obi nɔɔ Yesu Kristo. <sup>4</sup> Buokpana kukū ko mmle munta ye alɛ suoto leyɔɔ le ninkpe wo ni kawo nimu.

*Dikpe Nii Buokye Lɛkpa Kame.*

<sup>5</sup> Nunua, olaa wɔ buonu buokyeko ni Obi nwu nfū buoyie nwu lekya munta ye ni ninle alɛ, Yaa ninle lekpa, nioso ditunu kuninwii diesi nwo kaamɛ. <sup>6</sup> Nkpo oso nse buobue bule butɔɔbla onwii ku nnwɔɔ, kafɔɔ buokple busi diitunu ɔsaabla kame yi, ni lekakate ku ɔsaabla loo nle selaa kuafunu. <sup>7</sup> Kafɔɔ nse bukye lɛkpa kame fe mmle di nnwɔɔ kafɔɔ asi ni lɛkpa kame, ni butɔɔbla onwii ku bawo loo, ni Obi nɔɔ Yesu nto nwu ntoofoto wo di okpile biala kame.

<sup>8</sup> Nse buobue bule okpile dietika wo di suoto, ni buokyonkyo suoto, ni nwaako obue diesi wo kaame. <sup>9</sup> Kafoo nse buodiki sikipile loo buobue buotoko Yaa, ababla di otaa wo eebue eete ni kanya, ambla lesaa le niesieko nii, an-yo sikipile loo ankye wo, anfoto wo andiki di otanolaa loo obla kame. <sup>10</sup> Kafoo nse buobue bule bulobla okpile, ni buotika Yaa selaa kuafunu, ni otaa noo kafoo diesi wo kaame.

## 2

*Yesu Kristo N-ye Kaanya Loo Ootikiti Yaa Lekoto Anta Wo.*

<sup>1</sup> Babi nii bombote, kokpana nle mmle nkyesee ye ale bilaabla okpile. Kafoo nse otii owo lebla okpile yi, bukpe otii owo nin-ye wo ni kaanya ootikiti Yaa lekoto anta wo nii. Nnwoo ninle Yesu Kristo wo ninle ni tininite ne. <sup>2</sup> Nnwoo suoto di Yaa lefe eyo sikipile loo ekye wo ne. Diele sikipile loo lete, kafoo ku batii bamuu kaayi sikipile.

<sup>3</sup> Nse buoole Yaa afiofa, ni buofu bonu bule buye nwo. <sup>4</sup> Nse otii owo kobue ale "N-ye Yaa," kafoo onoole nwo afiofa, ni laate ale, nwaako ole diesi nwo kaame. <sup>5</sup> Kafoo otii wo ninkyoo nwo ni otaa atoko, ni lebombi le akpe eta ni Yaa lewo nimu. Nle bubayo muntofo bule kubio bubla ni onwii ku Yaa ninle ale, <sup>6</sup> otii wo nikobue ale ebla ni onwii ku Yaa, dikpe nii ansie nkpa fe mmle okle di Yesu Kristo lasie nii.

*Bisie Nkpa Di Lekpa Nwu Kame.*

<sup>7</sup> Babombote nii, diele kufiofa fole kokpana nkyesee ye. Kafoo nko biye ni dieyo ni bia

kaaso kakyeko. Nkũ ninle olaa wɔ bitoonu ni kofokofoko nɛ. <sup>8</sup> Kafɔɔ nunua kufiofa ko kɔkpana nkyesee ye nii, kubio kɔfɔle kule, diekye nwaako wɔ ninsi ni kaame ntoodiki suoto kuotuo di Kristo kame ku aye kafɔɔ kame. Diekye ditunu nfe kɔwaale ninfe, lekpa nwu nimu nimu nfe kɔkpa kofokofoko.

<sup>9</sup> Otii wɔ nikobue ale asi ni lekpa nwu kame, kafɔɔ eekyidi ni owo nɔɔ, ni eekple asi di ditunu kame bia mie. <sup>10</sup> Otii wɔ nimbɔmbɔ ni owo nɔɔ, ni asi di lekpa nwu kame, ni lesalesaa diesi nwɔ kaame nimata owo nɔɔ mbla ni okpile. <sup>11</sup> Kafɔɔ otii wɔ niekyidi ni owo nɔɔ, asi di ditunu nwu kame, akye ni kaame ananye ni nfũ oofe nii, diekye ditunu nwu nkpo ntoobie nwɔ anu.

<sup>12</sup> Babi nii bɔmbɔtɛ, kɔkpana olaa wɔ mmle nkyesee ye,  
diekye Yaa ntɔɔɔɔ sikipile lee ekye ye ta  
Kristo oso.

<sup>13</sup> Kɔkpana kukũ ko mmle nkyesee aye bate,  
diekye biye Kristo wɔ niawe ni bia kaso  
kakyeko.

Kɔkpana nkyesee aye bakosopo kafɔɔ,  
diekye bitoolenkee Kpiletɛ nwu nkpo.

<sup>14</sup> Kɔkpana kukũ ko mmle nta aye babi nii,  
diekye biye Teete nwu nkpo.

Kɔkpana nta aye bate kafɔɔ,  
diekye biye Kristo wɔ niawe ni bia kaso  
kakyeko.

Kɔkpana nta aye bakosopo kafɔɔ,  
diekye aye nfe ninkpe osie,  
di Yaa olaa nwu nkpo nsi ye ni kaame,  
bitolenkee kafɔɔ Kpiletɛ nwu nkpo.

<sup>15</sup> Bitambombɔ kayi ka mmle, ee lesaa le ninle ni kayi ka mmle lele. Diekye nse otii owo mbombɔ kayi ka mmle, ánwε lɛbɔmbɔ kuniwii aata Teete nwu nkpo. <sup>16</sup> Diekye kayi ka mmle asaa kpile ya amuu ninklee ni otii okonsɔ, asaa kpile ya di otii nnya amie ale awε nya nii, ku asaa ya suoto di otii nkanta ni kaayi ka mmle kame, kuninwii lenya diekye Teete nwu nkpo nfū, kayi ka mmle kame eekye. <sup>17</sup> Kayi ka mmle ku akonsokleesaa lenya amuu nfe kofe. Kafɔɔ otii wɔ nimbla ni Yaa dibiesaa kamasie nkpa dinaa ni kaloo.

*Biyila Di Lo Wɔ Nin-ye Ni Di Kristo Suoto.*

<sup>18</sup> Babi nii, kayi kalookɔ ntɔɔtɛtɛtɛ! Buatɔkɔ ye bulɛ Lo wɔ nimayila ni di Kristo suoto kamawa. Nunua balo kpinwu ba nin-ye ni di Kristo suoto nfe nkpe, nkpo oso buye bulɛ kayi kalookɔ ntɔɔtɛtɛtɛ nɛ. <sup>19</sup> Nwaako batii ba mmle baale dikudi loo le mmle kame basietɛ, nkpo oso beedie wo kaame nɛ. Nse dikudi loo le mmle kame basietɛ bale yi, nse baadie. Nkpo oso odie lɛma kaame loo ntodiki dietuo klekle ale kuonwii lɛma diele wo ole.

<sup>20</sup> Kafɔɔ aye Kristo ntɔnyɛnɛ Ninwuna Klekle eekpete ye di suoto, nioso bamuu lee nfe biye nwaako ɔlaa nwu. <sup>21</sup> Kɔkpana ye kukū ko mmle, diele ale bieye ni nwaako ɔlaa nwu oso, kafɔɔ mmle biye nwu ni ku mmle biye bile selaa kuafunu diele ni nwaako ɔlaa nwu.

<sup>22</sup> Ni owe nfe ninle laate nwu? Nnwɔɔ ninle otii wɔ nikobue ale Yesu diele ni Kristo wɔ di Yaa lape ni ofɔɔ nɛ. Otii nwu nkpo ninle Kristo Lo nɛ. Nnwɔɔ niesi Teete nwu nkpo ku Obi nɛ. <sup>23</sup> Diekye

otii wɔ niesĩ ni Obi nwu nkpo, eesĩ Teete nwu kafɔɔ. Otii wɔ niefũ ni Obi nwu, ni eefũ Teete nwu kafɔɔ nɛ.

<sup>24</sup> Bilolaa binyu bile ɔlaa wɔ bianu ni bia kaasɔ kayeko, biemufũ nwu bieklee siitu lee kame. Nse biemufũ ɔlaa nwu nkpo bieklee, ni obe lele bibabla onwii ku Obi nwu ku Teete. <sup>25</sup> Lesaa le di Kristo labue aate ale abata wo ni ninle nkpa be ninnaa ni kaloo.

<sup>26</sup> Ta batii ba nikokpee kɔnyaabe ale bɔɔkyɔnkyɔ ye ni oso kɔkpana ɔlaa wɔ mmle nkyesee ye. <sup>27</sup> Kafɔɔ aye yi, Kristo lenyɛnɛ Ninwuna nɔɔ eekpete ye di suoto. Di obe wɔ di Ninwuna nɔɔ nsi ye ni kaame, otii kuonwii diefi ye ale aatuo ye asaa. Diekye Ninwuna nɔɔ kotuo ye lesaa biala. Asaa ya kafɔɔ ootuo ye nii nte nkpo, diele selaa sele. Nkpo oso bikyɔɔ Ninwuna nwu asaa otuo atoko, biesie di onwii ɔbla kame ku Kristo.

<sup>28</sup> Babi nii bɔmbɔte, nwaako bisie di onwii ɔbla kame ku Kristo obe lele ale nse eekple ɛɛwa, buafuo nwo oyila di anu ku sekambi ale sinunso dilaakpe ye di dii nwu nkpo suoto. <sup>29</sup> Biye bile Kristo nte tinini, nkpo oso bitofo bile otii wɔ nimbla ni asaa tinini, Yaa obi ale.

### 3

#### *Yaa Babi Bule.*

<sup>1</sup> Binyu mmle okle di Teete Yaa mbɔmbɔ ni awo ba niefũ Yesu bonu ni lo! Nkpo oso ɔlee wo ale babi nɔɔ nɛ. Nwaako Yaa babi bule! Lesaa le oso kaayi batii dilootofo wo ni ninle ale baaye Yaa. <sup>2</sup> Basiewo nii bɔmbɔte, nunua, Yaa babi nfe bule. Kafɔɔ lesaa le bubale ni kaayi kamaa, Yaa

diidiki ni kayi atuo klekle. Kafɔɔ buye bulɛ di obe wɔ di Kristo makple anwa nii, bubate fɛ nnwɔɔ. Diekye, bubanyɔɔ nimmle ate ni kanya. <sup>3</sup> Otii biala ninkpe osuku onyu di Kristo ɔwabee wɔ mmle kamɛ yi, mbla suoto klekle fɛ mmle okle di Kristo nte ni klekle.

<sup>4</sup> Otii lele niebla okpile, atɔtaale Yaa kufiofa nwu. Diekye okpile ninle Yaa kufiofa ɔtaale nɛ. <sup>5</sup> Biye bilɛ Kristo lawa alɛ ɔbadiki batii siikpile kamɛ. Nioso nnwɔɔ okpile kuonwii diesi nwɔ kaamɛ. <sup>6</sup> Nkpo oso otii wɔ niebla ni onwii ku Kristo ninsie aakple aatɔɔbla okpile. Kafɔɔ otii wɔ ninsi ookple ambla ni okpile, ayinya Kristo nwu, ni aaye nwɔ kafɔɔ.

<sup>7</sup> Babi nii, bitanta otii kuonwii lakyɔnkyɔ ye! Otii lele nimbla asaa di osuku kanya yi, ni ate tinini fɛ mmle okle di Kristo nte ni tinini. <sup>8</sup> Otii lele ninsi ookple ambla okpile yi, ni Abonsam ole ale, diekye, Abonsam kɔbla okpile dieyɔ ni bia kasɔ kakyekɔ. Lɛsaa le oso di Yaa Obi nwu nkpo lawa ni ninle alɛ, ɔɔbalalaasa Abonsam ɔsaabla nwu.

<sup>9</sup> Batii ba ninle ni Yaa babi, mansinsie baatɔɔbla sikipile. Diekye Yaa omu letembi nfe nsi ma kaamɛ. Mansinfuo osie baatɔɔbla sikipile, diekye Yaa nfe ninle ma Kote. <sup>10</sup> Kase ka ninsie ni di Yaa babi ku Abonsam babi nteɛ ninle alɛ, otii lele ninambla asaa tinini ee abɔmbɔ owo nɔɔ, aale Yaa obi.

### *Bibɔmbɔ Bawo.*

<sup>11</sup> Asaa ya baatuo ye ni kaasɔ kakyekɔ ninle alɛ dikpe nii buɔɔbɔmbɔ bawo. <sup>12</sup> Dinaa alɛ buote fɛ Kain. Diekye Kpilete nwu ole aale ni aalo

obilema Abel nɛ. Be lesaa oso aalo nwo? Diekye ɔsaabla nɔɔ omu wo aabla ni ditale, kafɔɔ di obilema Abel ɔsaabla wo aabla ni late ni tinini oso.

<sup>13</sup> Nkpo oso babiloo, bitanta diabla ye ɔkpe nse kayi ka mmle batii lekyidi ye. <sup>14</sup> Buye kafɔɔ bule Yaa ntoodiki wo kuukpi kame buɔwa nkpa kame, diekye mumbombɔ bawo. Otii lele ninambombɔ owo nɔɔ kamaa eekple asi kuukpi nnɛ kame. <sup>15</sup> Otii lele niekyidi owo nɔɔ kamaa batii lote ale. Biye kafɔɔ bile batii lote nnaa nkpa be ninnaa ni kaloo kaame lema.

<sup>16</sup> Mmle okle di Kristo layɔ nkpa nɔɔ aata ni diisi loo yi, nni nieta buotofo lesaa le ninle ni lebombɔ nɛ. Nkpo oso dikpe nii awo kafɔɔ buɔɔ nkpa loo buota baawo loo disi. <sup>17</sup> Nse otii owo nkpe asaa, ɛɛnya owo nɔɔ diefi nwo, eekyisa anu, anankyakaako nwo, le nfe aafuo obuɛ ale ambombɔ Yaa? <sup>18</sup> Babi nii bombɔte, bitanta lebombɔ lee lale kanya kame fukuti selaa obuɛ. Kafɔɔ bita lebombɔ lee dile nwaako lele, diediki suoto dituo di ɔsaabla kame. <sup>19</sup> Nle mmle ɔbla kame bubatofo bule buye nwaako ɔlaa nwu nkpo munwe kafɔɔ sekambi di Yaa anu. <sup>20</sup> Nse otu loo nlo wo leɔɔ, buye bule ale Yaa lemuɔ alenke wo situ, aye kafɔɔ lesaa biala.

<sup>21</sup> Nkpo oso babiloo bombɔte, nse situ loo diloolo wo leɔɔ yi, ni bubafuo oyila di Yaa anu ku sekambi. <sup>22</sup> Lesaa lele kafɔɔ buɔkaale nwo munfu, diekye buole nwo kufiofa mumbra kafɔɔ lesaa le ninyɔɔ nwo ni kafutu. <sup>23</sup> Kufiofa ko eekpee wo ni ninle ale buafu Obi nɔɔ Yesu Kristo munnu, buabombɔ kafɔɔ bawo fe mmle di Kristo komie ankyeko ni ɔkye loo. <sup>24</sup> Batii ba bamuu

nikole ni Yaa kufiofa, bεεbla onwii ku Yaa, Yaa kafɔɔ lεbla onwii ku mma. Ta Ninwuna le di Yaa λeyɔ εεta wo ni oso, buye bule Yaa lεbla onwii ku awo.

## 4

### *Bisɔ Ninwuna Biala Binyu.*

<sup>1</sup> Babiloo bɔmbɔtε, batii ba bamuu nimbue ale bakpe ni Ninwuna Klekle nwu bitanfũ ma bianu. Kafɔɔ bisɔ ma binyu nse ninwuna nwu nkpo bakpe ni Yaa nfũ diekye. Diekye balaate ɔlaa babuεtεtε ntoodie beeyii kayi kako biala.

<sup>2</sup> Nya nle mmle bibayɔ minnya mintε nsũ bile Ninwuna nwu nkpo Yaa nfũ diekye ni. Otii lele nikobue ale Yesu Kristo lawa kayi ka mmle fe otii yi, ni Ninwuna nwu nkpo akpe ni lekye Yaa nfũ.

<sup>3</sup> Kafɔɔ otii lele niesĩ nle mmle di Yesu suoto, ni ninwuna le akpe ni diekye Yaa nfũ. Ninwuna le akpe ni lekye Lo wo nιetaka aye ni di Kristo suoto. Bianu bile ninwuna nwu mawa, nfe dikpe kafɔɔ kaayi kofokofoko.

<sup>4</sup> Kafɔɔ aye babi nii bɔmbɔtε, Yaa nfũ biekye, bitoolenkee kafɔɔ balaate ɔlaa babuεtεtε nwu nkpo. Diekye Ninwuna Klekle le ninsi ye ni kaame nlenke nle ninsi ni kaayi batii kame.

<sup>5</sup> Kaayi ka mmle batii bale ni oso, kayi asaa lete suoto mankatε. Kayi batii kafɔɔ nkyɔɔ ma ɔlaa atoko. <sup>6</sup> Kafɔɔ awo Yaa bale bule. Otii lele kafɔɔ ninye Yaa, ankyɔɔ wo ɔlaa atoko. Otii lele kafɔɔ ninanle Yaa ole, ankyɔɔ wo ɔlaa atoko. Nle mmle munya muntε nsũ Niinwuna le ninle ni nwaako lele ku nle ninle ni dikpile nε.

### *Yaa Nfũ Lεεbɔmbɔ Lekye.*



<sup>7</sup> Babiloo bɔmbɔtɛ, bita bubɔmbɔ bawo diekye Yaa nfũ lɛbɔmbɔ lekye. Otii lele nimbɔmbɔ bawo nɔɔ, Yaa obi ale, ni aye Yaa kafɔɔ. <sup>8</sup> Otii lele ninambɔmbɔ bawo nɔɔ, aaye Yaa. Diekye Yaa ninle lɛbɔmbɔ. <sup>9</sup> Yaa ladiki lɔbɔmbɔ nɔɔ aatuo wo, di obe wɔ aakyese Obi nɔɔ nwu onwii kayi ka mmle alɛ buawɛ nkpa diefe ni di suoto nɔɔ. <sup>10</sup> Nwaako, nya lɛsaa le mmle nikodiki lɛbɔmbɔ nintuo ni. Diele alɛ mmle okle mumbɔmbɔ ni Yaa nikodiki lɛbɔmbɔ kayi. Kafɔɔ Yaa niabɔmbɔ wo, ni aayɔ Obi nɔɔ aata ole siikpile loo disi mmle okle aalolaa ni awo ku nnwɔɔ ntɛɛ.

<sup>11</sup> Babiloo bɔmbɔtɛ, obe wɔ di Yaa labɔmbɔ wo ni mmle okle oso, ni dikpe nii, awo kafɔɔ buɔbɔmbɔ bawo. <sup>12</sup> Otii kuonwii diinya Yaa anya diidii. Kafɔɔ nse buɔbɔmbɔ bawo, ni Yaa nsi wo kaame, lɛbɔmbɔ nɔɔ kafɔɔ ntɔɔbla nimu kaame loo.

<sup>13</sup> Nwaako buofũ bonu bulɛ butɔɔbla onwii ku Yaa, nnwɔɔ kafɔɔ atɔɔbla onwii ku awo, diekye atɔɔɔ Ninwuna nɔɔ ɛta wo. <sup>14</sup> Butɔɔnya nle mmle, ni buɔtɔkɔ batii bamba bulɛ Teete nwu nkpo lekyese Obi nɔɔ alɛ awa abale batii Dikitɛ kaayi ka mmle kame nɛ. <sup>15</sup> Otii lele niediki eebue alɛ Yesu nle Yaa Obi, ni otii nwu nkpo ntɔɔbla onwii ku Yaa, Yaa kafɔɔ ntɔɔbla onwii ku nnwɔɔ. <sup>16</sup> Awo bamu loo buye, buofũ bonu kafɔɔ lɛbɔmbɔ le di Yaa nkpe ata wo nii.

Yaa ninle lɛbɔmbɔ. Batii ba nimbɔbɔ ni batii, batɔɔbla onwii ku Yaa, Yaa kafɔɔ ntɔɔbla onwii ku mma. <sup>17</sup> Nle mmle oso dikpe nii, lɛbɔmbɔ lewo nimu kaame loo, mmle okle bubafuo ni oyila di anu nɔɔ ku sɛkambi lɛɛkankoyi nwu suoto. Diekye mmle okle di Kristo nte nii, nkpo

okle bute kaayi ka mmle kame nε. <sup>18</sup> Lεyeke kuniwii ninsie lεbombo kame, kafoo lεbombo le niewo ni nimu ntososa lεyeke biala. Nioso otii wo ninyeke ni lεbombo diewo nimu, nse otii owo koyeke ni letokonanfi oso oyeye.

<sup>19</sup> Mumbombo Yaa diekye nnwoo niekawo obombo. <sup>20</sup> Nse otii owo kobue ale ambombo Yaa kafoo eekyidi owo nno, ni laate ale. Diekye otii lele ninambombo owo nno wo onya ni ku anu yi, alaafuo Yaa wo ononya ni ku anu obombo. <sup>21</sup> Kufiofa ko di Kristo lekpee wo ni ninle ale otii lele nimbombo Yaa yi, dikpe ni ambombo owo nno kafoo.

## 5

### *Butoolenkee Kayi Ku Ofu Onu Loo.*

<sup>1</sup> Otii lele niefu eenu ale Yesu ninle Kristo wo di Yaa lεpe ni ofoo, Yaa obi ale. Otii lele kafoo nimbombo ote, mbombo obi nno kafoo. <sup>2</sup> Nse mumbombo Yaa buole nwo afiofa kafoo yi, nni mun-yo muntofo bule mumbombo Yaa babi nε. <sup>3</sup> Diekye nse buole Yaa afiofa nwu nkpo yi, ni diotuo ale mumbombo nwo. Afiofa nno nwu nkpo ole kafoo nnaa osie. <sup>4</sup> Diekye otii lele ninle Yaa obi ntoolenkee kayi ka mmle. Lesaa le buoyo buolenkee ni kayi ka mmle ninle ofu onu loo. <sup>5</sup> Owe nimafuo kayi ka mmle olenkee? Otii wo lete nimafuo ni ninle nwo niefu eenu ale Yesu ninle ni Yaa Obi nwu nε.

### *Asaa Atie Ya Nin-ye Ni Yesu Kristo Suoto Jlaa Kamaa.*

<sup>6</sup> Yesu Kristo ninle otii wo niawa ni ku Yaa ntu okpeesa ku kukpi nno nto. Atawa ku Yaa

ntu okpeesa lete, kafɔɔ aawa ku ntu ku ntɔ nwu kame. Yaa Ninwuna nwu nimu kafɔɔ n-ye ɔlaa nwu kamaa ale kute nkpo. Diekye Ninwuna nwu ninle nwaako ɔlaa nwu. <sup>7</sup> Asaa atie ya nin-ye ni ɔlaa nwu kamaa ninle <sup>8</sup> Ninwuna nwu ku ntu nwu ku ntɔ nwu. Asaa atie ya mmle amuu kafɔɔ ɔlaa onwii kamaa baye. <sup>9</sup> Buofũ otii kamaa ɔlaa oyila bonu, kafɔɔ nse Yaa n-ye ɔlaa kamaa yi, nnwu, kuɔtaka katoɔ kulenke. Diekye nnwɔɔ nin-ye Obi nɔɔ kamaa ne. <sup>10</sup> Nkpo oso otii wɔ niefũ Yaa Obi nwu nkpo eenu ni n-ye ɔlaa wɔ mmle kamaa di otu nɔɔ kame. Kafɔɔ otii wɔ ninanfũ Yaa anu nii, ntɔɔbla nwo laate ku fununte, diekye aafũ Yaa ɔlaa wɔ eebue ni di Obi nɔɔ suoto anu. <sup>11</sup> ɔlaa nwu nkpo kamaa oyila ninle ale Yaa leyɔ nkpa be ninnaa ni kaloo eeta wo, nkpa nwu nkpo eeta wo ni nsi di Obi nɔɔ kame. <sup>12</sup> Otii wɔ niefũ ni Yaa Obi nwu nkpo yi, akpe nkpa be mmle. Otii wɔ kafɔɔ ninanfũ ni Obi nwu nkpo yi, anaa nkpa be mmle nwu nkpo.

### *Bikpe Nkpa Be Ninnaa Ni Kaloo.*

<sup>13</sup> Kɔkpana kukũ ko mmle nkyesee aye ba niefũ Yaa Obi nwu nkpo bienu nii, nle bitofo bile bikpe nkpa be ninnaa ni kaloo. <sup>14</sup> Bukpe osuku onyu di Yaa anu, diekye buofũ bonu bule nse buɔkaale nwo lesaa di dibiesaa nɔɔ kanya, annu wo. <sup>15</sup> Nse buye bule Yaa nkyɔɔ wo atoko nse buɔpe ɔlaa buɔɔɔ, ni buye kafɔɔ bule lesaa lele buɔkaale nwo, anta wo.

<sup>16</sup> Nse otii owo lenya owo nɔɔ kɔbla okpile wɔ ninamakpaa nwo kusifiko ni kukpi kame yi, ni aape ɔlaa ata Yaa diisi nɔɔ, Yaa kamatoɔ

nkpa. Nle mmle yi, batii ba nikɔbla ni sikipile se ninamakpaa ma sisifiko ni kukpi kame nlaka. Kafɔɔ okpile owo nkpe nwu yi, kunkpaa otii kunsifiko kukpi kame, diele nwu suoto nlaka nle biapɛ ɔlaa minta Yaa. <sup>17</sup> Ɔsaabla lele ninante tinini yi, okpile kule. Kafɔɔ sikipile sewo nkpe sinankpaa otii siasifiko ni kukpi kame.

<sup>18</sup> Buye bulɛ otii lele ninle ni Yaa obi ninkple aasie aatɔɔbla sikipile. Diekye Yaa Obi nwu nkpo nnyu nwɔ disi alɛ Kpiletɛ nwu nkpo ninfuɔ nwɔ amumu kuanwii ɔbla.

<sup>19</sup> Buye bulɛ Yaa babi bulɛ, kunte kayi ka mmle nwu nkpo kamuu nsi di Kpiletɛ nwu nkpo lɛkpaa kalɔ. <sup>20</sup> Buye bulɛ Yaa Obi nwu nkpo ntɔɔwa ɛɛbata wo lɛɔnu, alɛ buafuo nwaako Yaa nwu nkpo otofo. Nkpa loo nfe nsi di nwaakote Yaa nwu kame di Obi nɔɔ Yesu Kristo kame. Nwaako kafɔɔ nnwɔɔ ninle nwaakote Yaa nwu ku nkpa be ninnaa ni kaloo.

<sup>21</sup> Nkpo oso, babi nii, biblasa suoto di afiɔ ɔtɔ kame.

## **Yaa Kanya Ninii Fole Sɛlɛɛ**

### **Selee: Yaa Kanya Ninii Fole Sɛlɛɛ New Testament**

copyright © 2008 Wycliffe Bible Translators, Inc.

Language: (Selee)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 22 Feb 2024 from source files dated 29 Jan 2022

b86b27c9-33ee-5380-a452-244df2dc60c6